

mes. Je iure par le Seigneur du Leuant & du Ponant que nous les pouuons changer en vn peuple meilleur qu'eux, & que c'est chose qui nous est facile à faire; Laissez-les dans leurs erreurs iusques à ce qu'ils soient arriuez au iour qu'on à promis de les chastier, & qu'ils sortiront des monumens pour accourir au Iugement vniuersel, ils y accourront effrayez, & leur veüe sera couuette de honte; C'est ce iour qu'on leur a cy-deuant presché.

---

*LE CHAPITRE DE NOË,*  
*contenant vingt-huit versets, escrit*  
*à la Meque.*

**A**V nom de Dieu clement & misericordieux. Auant que chastier les hommes, nous auons enuoyé Noé pour leur prescher les peines de l'Enfer, il leur a dit. O peuple; ie vous presche les peines de l'Enfer, adorez vn seul Dieu & le craignez, obeissez moy, il vous pardonnera vos pechez, il differe vostre chastiment iusques à iour nommé, & ne le retardera pas lors que son heure sera vennë, si vous la scauiez vous vous conuertiriez. Apres il dit, Seigneur, i'ay exhorté ce peuple nuit & iour, mais mes exhortations ont esté tres-inutiles, ils se sont fortifiez dans leur impieté, & lors que ie les ay preschés ils ont mis leurs doigts dans leurs oreilles

& ont couverte leurs testes de leurs vestemens, pour ne pas ouyr, ils sont demeurez dans leur impieté, & se sont enorgueillis; Je les ay preschés publiquement, i'ay esleué ma voix, ie leur ay expliqué les mysteres de ta loy, ie leur ay dit, demandez pardon à Dieu il est tres-misericordieux, il vous enuoyera abondance de pluye pour arroser la terre, il vous dónera quantité de biens, & nombre d'enfans, il vous donnera des iardins ornez de fontaines & de fleuves, qui vous empesche d'honorer Dieu? c'est luy qui vous a créé en l'estat que vous estes, ne confidez-vous pas qu'il a créé sept Cieux l'vn sur l'autre? qu'il a créé la Lune avec sa clairté? & le Soleil avec sa lumiere? Il fait produire à la terre toute sorte de plantes, il vous fera retourner en terre, & vous en fera sortir, il l'a estendue, afin que vous marchiez dans ses chemins larges & spaçieux. Seigneur, dit Noé, ce peuple m'a desobey, ils ont suiuy ce qui ne leur peut donner ny lignée ny profit, mais plustost vn dommage tres-certain, ils ont conspiré contre moy, & ont dit entr' eux, ne quittez pas vos Dieux, ne quittez pas Od, Soa, Igout, Iaoc, & Nefer, ils font deuoyez du droict chemin, Seigneur augmente leur confusion; Alors ils ont esté submergez à cause de leurs pechez, ils seront precipitez dans le feu d'où personne ne les peut deliurer que Dieu. Noé a dit, Seigneur, ne laisse point d'impie sur la terre, ils deuoyeront tes creatures du droit chemin, ils laisseront des enfans menteurs & impies comme

*Ce sont  
des Idoles*

eux, pardonne-moy mes pechez, pardonne les pechez à mon pere, à ceux de ma lignée, à ceux & à celles qui croiront en ta loy, & extermines les iniustes.

---

*LE CHAPITRE DES DEMONS,  
contenant vingt-huit versets, escrit  
à la Meque.*

*Quelques Mahometans intitulent ce Chapitre  
des Esprits.*

**A**V Nom de Dieu clement & misericordieux. Dis au peuple, j'ay receu vne inspiration, que quelques Demons m'ont escouté lors que ie lisois l'Alcoran, & qu'ils ont dit, nous auons ouy lire l'Alcoran miraculeux, il enseigne le droict chemin, nous croyons en ce qu'il contient, nous ne croyons pas que Dieu ait des compagnons, nous croyons qu'il n'y a qu'un seul Dieu, nous ne croyons pas qu'il ayt des femmes ny des enfans, nos ignorants blasphemement contre sa diuine Majesté, neantmoins nous estimions qu'ils ne le pouuoient pas faire. Il y a des hommes qui demandent secours aux Demons & accroissent leur confusion, parce qu'ils disent que Dieu ne fera ressusciter personne; Quelques